



# **Tabang Gikan Sa Kahitas-an**

**Tinigum ni Watson Goodman**

**Dili Ibaligya**

**Ang “TABANG GIKAN SA KAHITAS-AN”** mao ang tinigom nga mga bersikulo sa Bibliya nga gihugpong sumala sa mga ulohan nga gihisgotan. Ako nagtuo nga ang labing maayong komentaryo sa Bibliya mao ang Bibliya mismo.

Ang Pulong sa Dios “nagagikan sa kahitas-an” ug makatabang gayod kini sa mga kasingkasing nga gigutom ug giuhaw sa pagkamatarong. Ang Ginoo magpadayag sa Iyang kaugalingon ngadto sa tawo ug maghatag sa Iyang kalipay ug kalinaw sa magtutuo, sa diha nga ang tawo maghinulsol, magbiya sa iyang sala, mopasulod ni Jesu-Cristo sa iyang kinabuhi, ug magtuo sa tibuok niyang kasingkasing ni Ginoong Jesus ingon nga Manluluwas. Nasinati ko kini niadtong tuig 1937, ug sukad wala ko gayod bugtoa kining katingalahang pakig-ambitay uban sa Ginoo. Busa nagdasig ako kanimo sa pagtugyan ngadto Kaniya ingon nga imong Manluluwas ug Ginoo. Buhata kini **KARON** kon wala pa nimo kini mahimo.

# ANG GUGMA SA DIOS

1

Ug gikan kang Jesu-Cristo, ang kasaligang saksi, ang unang gibanhaw nga mao usab ang nagmando sa mga hari sa kalibotan. Gihigugma kita niya ug pinaagi sa iyang dugo giluwasa kita niya sa atong mga sala.

—Gipadayag 1:5

Nagpakita ako kanila gikan sa halayo. Mga Israelita, gihigugma ko kamo kanunay busa gipadayon ko pagpaila kaninyo ang gugma kong walay paglubad.

—Jeremias 31:3

Bisperas kadto sa Kasaulogan sa Pagsaylo. Nasayod si Jesus nga miabot na ang panahon sa iyang pagbiya niining kalibotana

ug pag-adto sa Amahan. Kanunay niyang gihigugma kadtong mga iya nga ania sa kalibotan ug gihigugma niya sila hangtod sa kataposan.

—Juan 13:1

Kay gihigugma pag-ayo sa Dios ang kalibotan ug tungod niini gihatag niya ang iyang bugtong Anak, aron ang tanan nga motuo kaniya dili malaglag kondili makabaton hinuon sa kinabuhing dayon.

—Juan 3:16

Apan gipakita sa Dios kanato ang gidak-on sa iyang paghigugma kanato kay sa makasasala pa kita nagpakamatay si Cristo alang kanato.

—Roma 5:8

Walay makalimod unsa kadako ang tinago sa atong relihiyon: Nagpakita siya ingon nga tawo, ug namatud-an nga matarong pinaagi sa Espiritu, ug nakita siya sa mga anghel. Giwali siya ngadto sa kanasoran, gituohan dinhi sa kalibotan, ug gibayaw ngadto sa langit. —1 Timoteo 3:16

Si Jesus mitubag, “Dugay na akong nakig-uban kaninyong tanan unya wala ka pa gihapon makaila kanako, Felipe? Ang nakakita kanako nakakita usab sa Amahan. Busa nganong nag-ingon ka man, ‘Ipakita kanamo ang Amahan’? Wala ka ba motuo,

Felipe, nga ako anaa sa Amahan ug ang Amahan ania kanako? Wala maggikan kanako ang mga pulong nga gisulti ko kaninyo. Ang Amahan nga ania kanako nagbuhat sa iyang kaugalingong buluhaton.” —Juan 14:9, 10

Sa wala pay nabuhat bisan unsa, ang Pulong diha na. Ang Pulong uban sa Dios ug ang Pulong Dios. Ug ang Pulong nahimong tawo ug mipuyo uban kanamo, puno sa grasya ug kamatuoran. Nakita namo ang iyang himaya, ang himaya nga iyang nadawat ingon nga bugtong Anak sa Amahan. —Juan 1:1 ug 14

Kay ang tibuok nga pagka-Dios anaa kang Cristo sa iyang pagkatawhanon.  
—Colosas 2:9

Natawo alang kanato ang usa ka bata; gihatag kanato ang usa ka anak nga lalaki, ug siya ang magmando sa tanan ug nganlan siyag “Maalamong Magtambag,” “Dios nga Gamhanan,” “Amahan Hangtod sa Kahangtoran,” “Prinsipe sa Pakigdait.”  
—Isaias 9:6

Ang anghel mitubag, “Mokunsad kanimo ang Espiritu Santo ug magpabilin ang gahom sa

Dios diha kanimo. Tungod niini, ang balaan nga bata tawgon nga Anak sa Dios.”  
—Lucas 1:35

Samtang nagsulti siya niini, usa ka masanag nga panganod ang mitabon kanila ug unya usa ka tingog gikan sa panganod ang miingon, “Kini mao ang pinangga kong Anak nga akong gikahimutan. Pamati kamo kaniya!”  
—Mateo 17:5

Ang magpahayag nga si Jesus mao ang Anak sa Dios, siya anaa sa Dios ug anaa kaniya ang Dios.  
—1 Juan 4:15

## **4 NAGSULTI SI HESUS KANATO KON KINSA SIYA**

Ug si Jesus miingon kaniya, “Ako mao ang pagkabanhaw ug ang kinabuhi. Ang nagtuo kanako, bisan tuod mamatay, mabuhi.”  
—Juan 11:25

Si Jesus mitubag, “Kamo taga dinhi sa yuta apan ako gikan sa langit. Kamo taga dinhi sa kalibotan apan ako dili taga dinhi.”  
—Juan 8:23

Si Jesus mitubag, “Sultihan ko kamo: wala pa gani matawo si Abraham, ‘Ako mao na.’ ”  
—Juan 8:58

Si Jesus miingon kanila, “Ako mao ang pan nga naghatag sa

kinabuhi. Ang moari kanako dili na gayod gutomon ug ang motuo kanako dili na gayod uhawon.”

—Juan 6:35

Busa miingon si Jesus pag-usab, “Sultihan ko kamo: ako ang pultahan sa mga karnero.”

—Juan 10:7

“Samtang ania pa ako sa kalibotan, ako ang kahayag sa kalibotan.”

—Juan 9:5

“Kamo nagtawag kanakog Magtutudlo ug Ginoo ug husto kana kay mao man kana ako.”

—Juan 13:13

Si Simon mitubag, “Magtutudlo, tibuok gabii kaming nangisda ug wala gayod kami nakuha apan kay sugo man nimo, akong itaktak ang mga pukot.” Ilang gitaktak ang mga pukot ug daghan gayod kaayong isda ang ilang nakuha ug tungod niini ang ilang mga pukot hapit na magisi.

—Lucas 5:5, 6

May duha ka buta nga lalaki nga naglingkod daplin sa dalan. Nakadungog sila nga si Jesus hapit nang molabay busa misinggit sila, “Kaliwat ni David!

Kaluy-i intawon kami!” Naluoy si Jesus kanila ug gihikap niya ang ilang mga mata ug dihadiha nakakita sila ug misunod kaniya.

—Mateo 20:30 ug 34

Unya iyang gipalingkod sa mga sagbot ang mga tawo ug gikuha niya ang lima ka pan ug ang duha ka isda. Unya mihangad siya sa langit ug nagpasalamat sa Dios. Gipikaspikas niya ang mga pan ug gihatag ngadto sa mga tinun-an nga mao usab ang nanghatag niini ngadto sa mga tawo. Nanganon ang tanan ug nangabusog. Unya gihipos sa mga tinun-an

ang mga sobra nga nakapuno ug napulog-duha ka bukag. Lima ka libo ang gidaghanon sa mga

tawo nga nangaon, walay labot sa mga babaye ug sa mga bata.  
—Mateo 14:19-21

## 6 SI HESU-KRISTO MAGMUMUGNA UG GINOO

Pinaagi kaniya gibuhat sa Dios ang tanan ug walay bisan usa sa tanan nga nabuhat nga dili pinaagi kaniya.  
—Juan 1:3

Kasaligan ang Dios nga nagtawag kaninyo aron mahiusa sa iyang Anak nga si Jesu-Cristo nga atong Ginoo. —1 Corinto 1:9

Kay si Cristo namatay ug nabanhaw aron mahimong Ginoo sa mga buhi ug sa mga patay.  
—Roma 14:9

Kay pinaagi kaniya gibuhat sa Dios ang tanan nga atua sa langit ug ania sa yuta, makita ug dili makita—mga gahom nga espirituhanon, mga pamunoan, mga hari ug ang tanan nga nagmando. Gibuhat sa Dios ang tanan pinaagi kaniya ug alang kaniya.  
—Colosas 1:16

Ug ang tanan magsangyaw nga si Jesu-Cristo mao ang Ginoo, alang sa himaya sa Dios nga Amahan.  
—Filipos 2:11



## **SI HESU-KRISTO MAOY MAGHUHUKOM SA TANAN 7**

Sa atubangan sa Dios ug ni Cristo Jesus nga maoy maghukom sa tanang tawo, buhi o patay, tungod kay mobalik man siya aron paghari, awragon ko ikaw. —2 Timoteo 4:1

Busa nganong naghukom ug nagtamay man kamo sa inyong isigkamagtutuo? Moatubang kintang tanan sa Dios aron hukman niya. —Roma 14:10

“Ug ang tanang tawo sa kalibotan tigumon sa iyang atubangan. Unya bahinon niya sila sa duha ka pundok, sama sa usa ka magbalantay sa hayop nga

maglain sa mga karnero gikan sa mga kanding.” —Mateo 25:32

“Ug gisugo kami niya sa pagwali sa Maayong Balita ngadto sa katawhan ug sa pagmatuod nga siya mao ang gipili sa Dios paghukom sa mga buhi ug sa mga patay.” —Mga Buhat 10:42

Sumala sa Maayong Balita nga akong giwali, mao kini ang mahitabo unya niadtong Adlaw, nga ang Dios pinaagi kang Jesu-Cristo, maghukom sa tinagong mga hunahuna sa mga tawo. —Roma 2:16

## **8 KALUWASAN PINAAGI LAMANG KANG KRISTO**

“Gisultihan ko kamo nga mangamatay kamo diha sa inyong mga sala ug mahitabo gayod kini kon dili kamo motuo nga ‘Ako mao.’”

—Juan 8:24

“Ako ang pultahan. Ang mosulod agi kanako maluwas. Maka-sulod-gawas siya ug makakaplag siyag masibsib.”

—Juan 10:9

Ang Dios wala magpili kanato aron kita iyang silotan kondili aron maluwas pinaagi sa atong Ginoong Jesu-Cristo.

—1 Tesalonica 5:9

Kay nahingpit man siya, nahimo siyang tinubdan sa dayon nga kaluwasan alang sa tanan nga masinugtanon kaniya.

—Hebreo 5:9

Si Jesus mitubag, “Ako ang dalan, ang kamatuoran ug ang kinabuhi. Walay makaadto sa Amahan kon dili moagi kanako.”

—Juan 14:6

“Ang kaluwasan makaplagn lamang diha kaniya kay dinhi sa kalibotan wala nay laing ngalan nga gihatag sa Dios ngadto sa katawhan nga maoy makaluwas kanato.”

—Mga Buhat 4:12

## **KALUWASAN PINAAGI LAMANG KANG KRISTO 9**

Apan kamo gihiusa sa Dios diha kang Cristo Jesus ug diha kang Cristo aduna kitay kaalam. Pinaagi kaniya nahimo kitang matarong atubangan sa Dios, nahimo kitang balaang katawhan sa Dios ug gihatagan kita ug kawawasan. —1 Corinto 1:30

Apan pinaagi sa grasya nga gigasa sa Dios ngadto kanila, mahimo silang matarong pinaagi kang Cristo Jesus nga nagluwas kanila. —Roma 3:24

Pasalamat ninyo ang Amahan nga naghimo kaninyong takos sa pag-ambit sa gitagana sa Dios

alang sa iyang katawhan didto sa gingharian sa kahayag. Kay giluwawas kita niya gikan sa gahom sa kangitngit ug gidala ngadto sa gingharian sa iyang hinigugmang Anak nga maoy naglukat kanta ug nagpasaylo sa atong mga sala. —Colosas 1:12-14

Nag-awit sila ug bag-ong awit: “Takos ka sa pagkuha sa linukot nga basahon ug sa pagtangtang sa mga silyo niini. Kay gipatay ka ug pinaagi sa imong dugo gitubos mo ang katawhan alang sa Dios, gikan sa tanang banay, pinulongan, katawhan, ug kanasoran.” —Gipadayag 5:9

## 10 **PAGTUBOS PINAAGI SA DUGO NI KRISTO**

Kay gilukat kita pinaagi sa dugo ni Cristo, sa ato pa, napa-saylo na ang atong mga sala. Pagkadako gayod sa grasya sa Dios.  
—Efeso 1:7

Apan kon magpuyo kita sa kahayag, ingon nga ang Dios anaa sa kahayag, magkahiusa kita ug ang dugo ni Jesus nga iyang Anak maghugas sa tanan natong kasal-anan.  
—1 Juan 1:7

Kon tinuod man kini, unsa pa kadako ang nahimo sa dugo ni Cristo! Pinaagi sa walay kataposang Espiritu gihalad niya ang iyang kaugalingon ingon

nga hingpit nga halad ngadto sa Dios. Ang iyang dugo maoy maghinlo sa atong mga konsensya sa walay kapuslanang mga buhat aron mag-alagad kita sa buhing Dios.  
—Hebreo 9:14

Nasayod kamo nga ang gibayad aron pagluwas kaninyo gikan sa daotang pagkinabuhi nga inyong nasunod sa inyong mga katigulangan, dili butang nga kawad-an ug bili sama sa salapi o bulawan. Giluwas kamo sa bililhong dugo ni Cristo kinsa, sama sa nating karnero, walay buling o mansa.  
—1 Pedro 1:18, 19

## **KALUWASAN PINAAGI SA PAGTUO KANG KRISTO 11**

Kay pinaagi sa pagtuo nalunas kamo tungod sa grasya sa Dios. Dili kini inyong buhat kondili gasa sa Dios. Busa walay makapasigarbo niini sanglit dili man kini bunga sa inyong mga paningkamot. —Efeso 2:8, 9

Kay ang tanang anak sa Dios makabuntog sa kalibotan ug gidaog nato ang kalibotan pinaagi sa atong pagtuo. —1 Juan 5:4

Kay gihimo na man kitang matarong sa Dios pinaagi sa pagtuo, may panagdait na kita uban sa Dios pinaagi sa atong Ginoong Jesu-Cristo. —Roma 5:1

Busa gipangutana nila siya, “Unsa may among buhaton aron pagtuman sa mga ipabuhat sa Dios?” Si Jesus mitubag, “Ang buluhaton nga ipabuhat sa Dios kaninyo mao nga motuo kamo sa iyang gipadala.” —Juan 6:28, 29

Apan gisulat kini aron kamo motuo nga si Jesus mao ang Mesiyas, ang Anak sa Dios, ug pinaagi sa maong pagtuo makabaton kamo ug kinabuhi diha sa iyang ngalan. —Juan 20:31

“Saligi ang Ginoong Jesus, ug maluwas ka.”  
—Mga Buhat 16:31b

Sama sa kahabog sa langit ibabaw sa yuta, mao usab kadako ang iyang gugma kanila nga may kahadlok ug pagtahod kaniya. Apan ang gugma sa Ginoon kanila nga nagpasidungog kaniya motunhay hangtod sa kahangtoran; molungtad ang iyang kaayo sa tanang kaliwatan.

—Salmo 103:11, 17

Giluwes kita niya. Kini dili tungod sa bisan unsang maayo nga atong nabuhat kondili tungod sa iyang kaluoy. Giluwes kita niya pinaagi sa paghugas kanato aron kita matawo pagusab ug makabaton ug bag-ong

kinabuhi diha sa Espiritu Santo.

—Tito 3:5

Dili gayod molubad ang gugma sa Ginoon ug walay kinutoban ang iyang kaluoy; bag-o kini adlaw-adlaw. Pagkamatinumanon gayod niya. —Pagbangotan 3:22, 23

Ang gugma mong walay paglubad misangko sa kalangitan ingon man ang imong pagkamatinud-anon. —Salmo 108:4

Pasalamatan nato ang Dios ug Amahan sa atong Ginoong Jesu-Cristo, ang maluluy-ong Amahan ug Dios nga tinubdan sa tanang pagdasig. —2 Corinto 1:3

# NAGTAWAG ANG DIOS KANATO SA PAGDUOL KANIYA

13

Ang Espiritu ug ang Panga-saw-onon miingon, “Dali ngari!” Ug ang tanang nakadungog paingna usab, “Dali ngari!” Duol kamong giuhaw ug kadtong may gusto, inom sa walay bayad nga tubig nga naghatag sa kinabuhi.

—Gipadayag 22:17

Ang kataposang adlaw sa kasaulogan mao ang labing importante. Sa maong adlaw mibarog si Jesus ug miingon sa kusog nga tingog, “Paduola kanako ang giuhaw ug paimnon ko siya.” —Juan 7:37

Nag-ingon ang GINOO, “Ngari

kamo ug maghusay kita. Bisag unsa ka pula ang inyong sala, maputi kini kaayo; bisan pa kinig dagtom-pula, maputi kini sama sa balhibo sa karnero.”

—Isaias 1:18

“Duol kamo kanako, kamong tanan nga gikapuyan ug gibugatan sa inyong gipas-an ug papa-hulayon ko kamo.” —Mateo 11:28

Ang GINOO miingon, “Kamong giuhaw, ngari kamo ug inom. Bisag wala kamoy kuwarta, ngari, palit ug kaon! Palit kamog bino ug gatas nga walay bayad.”

—Isaias 55:1

## 14 DILI ANG TANANG TAWO ANAK SA DIOS

Aron walay ikasaway kaninyo ingon nga hingpit nga mga anak sa Dios nga nagpuyo sa katilingban nga hiwi ug daotan. Kinahanglan nga modan-ag kamo taliwala kanila sama sa mga bituon nga nagsidlak sa kalangitan.

—Filipos 2:15

Ang tanang gimandoan sa Espiritu sa Dios, mga anak sa Dios.

—Roma 8:14

Busa ang Ginoo nag-ingon, “Bulagi sila ug paglain gikan kanila. Ayaw kamo paghikap sa hugaw, ug dawaton ko kamo.

Ako mahimong inyong amahan, ug kamo mahimong akong mga anak, nag-ingon ang Ginoo nga Labing Gamhanan.”

—2 Corinto 6:17, 18

Apan kadtong midawat ug misalig kaniya gihatagan niya sa katungod nga mahimong mga anak sa Dios.

—Juan 1:12

Ang kalainan sa mga anak sa Dios ug sa mga anak sa Yawa mao kini: ang wala magbuhat sa matarong o wala mahigugma sa iyang isigkatawo, dili anak sa Dios.

—1 Juan 3:10



# UNSAY GISULTI SA DIOS MAHITUNGOD SA MAKAHUBOG NGA ILMNON

15

Alaot kamong mosayo pagbangon sa buntag aron makainom sa isog nga ilimnon, ug kamong magtukaw sa lalom nga kagabhion hangtod mangahubog.

—Isaias 5:11

Sayon kaayo pag-ila sa buhat sa tawhanong kinaiya. Makita kini diha sa salawayon nga pakighilawas, hugaw ug hilas nga mga buhat, ingon man sa pagsimba sa mga diosdios ug sa pagpamang. Makita usab kini sa pagdinumtanay, pagbingkilbingkil, sa kasina, sa kapungot, sa kahakog, sa pagkabahinbahin, pagkamasinahon, pagkapalahubog, pagkamapatuyangon sa lawasnong

kaibog ug uban pang mga butang nga sama niini. Busa pasidan-an ko kamo karon sama sa akong gihimo kaniadto: ang magbuhat niining mga butanga walay dapit sa Ginghamian sa Dios.

—Galacia 5:19-21

Magtarong kita sa atong pagkinabuhi ingon nga mga tawo nga anaa sa kahayag—dili sa pagpatuyang sa paghudyaka ug sa paghuboghubog, dili sa kahilayan ug sa kalaw-ayan, dili sa pagpakig-away ug sa pagkamasinahon. Hinuon, himoa ang Ginoong Jesu-Cristo nga inyong tigpanalipod ug ayaw kamo padaog sa inyong lawasnong kaibog. —Roma 13:13, 14

...“Maayong Magtutudlo, unsa may kinahanglan nakong buhaton aron madawat ko ang kinabuhing dayon?” Nangutana si Jesus kaniya, “Nganong miingon ka man nga ako maayo? Walay maayo gawas sa Dios. Nahibalo ka sa mga sugo: ‘Ayaw pagpatay, ayaw panapaw, ayaw pangawat, ayaw pagbutangbutang, ayaw panglimbong, tahora ang imong amahan ug inahan.’” Mitubag ang tawo, “Magtutudlo, nagtuman ako niining tanang sugo sukad pa sa akong pagkabatانون.” Mitutok si Jesus kaniya

uban ang gugma ug namulong, “Usa ra ka butang ang kinahanglan nimong buhaton. Lakaw ug ibaligya ang tanan mong katigayonan ug ihatag ang halin ngadto sa mga kabos ug maangkon mo ang mga bahandi sa langit. Unya balik nganhi ug sunod kanako.” —Marcos 10:17b-21

Si Jesus mitubag, “ ‘Higugmaa ang Ginoo nga imong Dios sa tibuok mong kasingkasing, sa tibuok mong kalag ug sa tibuok mong hunahuna.’ Kini ang labing dako ug labing importanteng sugo.” —Mateo 22:37, 38

Ayaw limbongi ang inyong kaugalingon pinaagi sa pagpamati lamang sa pulong sa Dios; hinuon, tumana kini. —Santiago 1:22

Mga anak, ayaw kamo palimbong! Ang nagbuhat sa matarong, matarong sama kang Cristo. Ang magpadayon sa pagpakasala iya sa Yawa kay ang Yawa nagpakasala man sukad pa gayod sa sinugdan.

—1 Juan 3:7, 8a

Sa walay duhaduha nasayod kamo nga ang mga daotan dili makasulod sa Ginghamarian sa Dios.

Ayaw pagpalimbong kay ang mga tawo nga makihilawason, o nagsimba sa mga diosdios, o mga mananapaw, o nakighilawas sa isigkalalaki o isigkababaye, o kawatan, o hakog, o mga palahubog, o tigbutangbutang, o mga malapason sa balaod, dili makasulod sa Ginghamarian sa Dios.

—1 Corinto 6:9, 10

Ayaw kamo patunto kang bisan kinsa pinaagi sa mga pulong nga binuang kay tungod niini mahiagom sa kapungot sa Dios ang mosupil kaniya.

—Efeso 5:6

Apan ang tawo nga makasala mamatay. Ang anak dili mag-antos tungod sa sala sa iyang amahan sama nga ang amahan dili mag-antos tungod sa sala sa iyang anak. Ang tawong matarong gantihan tungod sa iyang pagkamatarong ug ang tawong daotan silotan tungod sa iyang pagkadaotan. —Ezequiel 18:20

Mabuhi ang tawo nga may hugot nga tinguha sa pagbuhat sa matarong, apan mamatay ang magbuhat sa daotan.

—Panultihon 11:19

Miabot sa kalibotan ang sala pinaagi sa usa ka tawo ug ang

sala nagdalag kamatayon. Busa mikaylap ang kamatayon ngadto sa tanang katawhan kay nakasala man ang tanang tawo.

—Roma 5:12

Ang paghunahuna kanunay sa mga butang nga tawhanon mosangpot sa kamatayon apan ang paghunahuna kanunay sa mga butang nga espirituhanon mosangpot sa kinabuhi ug kalinaw.

—Roma 8:6

Unya ang iyang daotang tinguha manamkon ug manganak ug sala ug inigkahingkod na sa sala, magdala kinig kamatayon.

—Santiago 1:15

Gitudlo ko kaninyo ang akong nadawat nga mahinungdanon kaayo: kini mao nga si Cristo namatay alang sa atong mga sala sumala sa nahisulat sa Kasulatan. Gilubong siya ug sa ikatulo ka adlaw gibanhaw sumala sa nahisulat sa Kasulatan.

—1 Corinto 15:3, 4

“Ako ang buhi! Namatay ako apan tan-awa, buhi ako ug dili na gayod mamatay. Ilalom sa akong gahom ang Kamatayon ug ang Hades.” —Gipadayag 1:18

“Ang Amahan nahigugma kanako kay ako andam man pagtugyan

sa akong kinabuhi aron madawat ko kini pagbalik. Walay makahimo pagpatay kanako. Ang akong kinabuhi ihatag ko sa kaugalingon kong pagbuot. Mahimo ko ang paghalad sa akong kinabuhi ug mahimo ko usab ang pagbawi niini. Mao kini ang gisugo kanako sa akong Amahan.” —Juan 10:17, 18

Unya miduol si Jesus ug gihikap niya ang lungon ug mihunong ang mga tawo nga nagyayong sa lungon. Unya miingon si Jesus, “Dong, bangon!” Mibangon ang batan-on nga patay na unta ug misulti. —Lucas 7:14, 15a

“ ‘Ayaw pagsimba ug laing dios gawas kanako.

“ ‘Ayaw kamo pagkulit ug lara-wan sa bisan unsa nga atua sa langit o sa ania sa yuta o sa tu-big ilalom sa yuta. Ayaw kamo pagyukbo o pagsimba kanila....

“ ‘Ayaw pasipad-i ang akong ngalan kay ako, ang GINOO nga inyong Dios, mosilot gayod kang bisan kinsa nga magpasipala sa akong ngalan.

“ ‘Tamda ug balaana ang Ad-lawng Igpapahulay sumala sa gisugo kaninyo sa GINOO nga inyong Dios. Pagtrabaho kamo sulod sa unom ka adlaw lamang.

“ ‘Tahora ang inyong amahan ug ang inyong inahan sumala sa gisugo kaninyo sa GINOO nga inyong Dios....

“ ‘Ayaw kamo pagpatay.

“ ‘Ayaw kamo panapaw.

“ ‘Ayaw kamo pangawat.

“ ‘Ayaw kamo pagbutangbutang sa inyong isigkatawo.

“ ‘Ayaw kamo kaibog sa asawa sa inyong isigkatawo o sa ilang balay o sa ilang uma o sa ilang ulipon o sa ilang kahayopan o sa bisan unsa nga ilaha.’ ”

—Deuteronomio 5:7-21

## DILI KA MAKATAGO GIKAN SA DIOS

21

“Walay makatago gikan kanako. Wala ba kamo masayod nga ako anaa sa tanang dapit sa langit ug sa yuta?” —Jeremias 23:24

Asa ba ako paingon aron mahilayo ako sa imong Espiritu? Asa ba ako motago aron mahilayo sa imong presensya? Kon mosaka ako sa langit, atua ka didto; kon mohigda ako didto sa kalibotan sa mga patay, atua ka usab didto. Apan bisan ang kangitngit dili ngitngit alang kanim, ug ang gabii sama kahayag sa adlaw. Ang kangitngit ug ang

kahayag managsama ra alang kanim. —Salmo 139:7, 8 ug 12

Makita sa GINOO ang tanang panghitabo; nagtan-aw siya kanato, daotan man kita o maayo.

—Panultihon 15:3

Walay butang nga matago gikan sa Dios. Ang tanan dayag ug makita sa iyang mga mata ug kitang tanan maghatag kaniyang husay sa atong binuhatan.

—Hebreo 4:13

“Kay ang tanan nga gitagoan makit-an ug ang tanan nga giling mabutyag.” —Lucas 8:17

## WALAY KATAPUSANG SILOT SA MGA DILI DIOSNON

Apan pinaagi usab sa pulong sa Dios ang kalangitan ug ang yuta nga atong nakita karon gitagana aron laglagon pinaagi sa kalayo. Giandam kini alang sa adlaw nga ang mga daotan hukman ug laglagon. —2 Pedro 3:7

Kamatayon ang sangpotan sa mga daotan ug sa tanang nagsalikway sa Dios.

—Salmo 9:17

“Kon ang imong kamot o ang imong tiil makaangin kanimo sa pagpakasala, putla kini ug ilabay! Mas maayo pa nga mosu-

lod ka sa kinabuhing dayon nga usa ray kamot o usay tiil kay sa kumpleto kag kamot ug tiil apan itambog ka sa kalayo nga walay pagkapalong.” —Mateo 18:8

Ipadala unya sa Anak sa Tawo ang iyang mga anghel. Hiposon nila gikan sa iyang gingharian ang tanan nga maoy nakaangin sa mga tawo sa pagpakasala, lakip ang tanan nga nagbuhat ug daotan. Itambog sila ngadto sa kalayo nga nagdilaab diin maghilak sila ug magkagot sa ilang ngipon. —Mateo 13:41, 42



Gihingpit dinhi kanato ang gugma aron mahingpit ang atong kaisog sa Adlaw sa Paghukom kay ang kinabuhi nato dinhi sa kalibotan sama na man sa kinabuhi ni Cristo. —1 Juan 4:17

Kay kinahanglan moatubang kitang tanan kang Cristo aron iyang hukman aron ang tagsatagsa makadawat sa angay kaniya sumala sa iyang nabuhat, maayo o daotan, dinhi sa kalibotan. —2 Corinto 5:10

Ang Dios mahibalang moluwas sa mga tawong diosnon gikan sa mga pagsulay ug mosilot sa mga

daotan sa Adlaw sa Paghukom.

—2 Pedro 2:9

Ang tanan kinahanglan mamatay sa makausa ug tapos niana hukman siya sa Dios.

—Hebreo 9:27

“Kay nagtagal siyag adlaw nga hukman niya ang tibuok kalibotan pinasubay sa hustisya pinaagi sa tawo nga iyang gipili. Ug gimatuod niya kini ngadto sa tanang katawhan pinaagi sa pagbanhaw kaniya.” —Mga Buhat 17:31

Busa ang tagsatagsa kanato maghatag ug husay sa iyang kagalingon ngadto sa Dios.

—Roma 14:12

“...Kontra sa Dios ang mga garboso apan maluoy siya sa mga mapaubsanon.” —1 Pedro 5:5b

Kay nasayod kamo sa grasya sa atong Ginoong Jesu-Cristo. Bisan siya dato, nagpakakabos siya tungod kaninyo aron mada-to kamo pinaagi sa iyang kaka-bos. —2 Corinto 8:9

Apan dili managsama kining duha kay dili sama sa sala ni Adan ang gasa sa Dios. Kay kon daghan ang nangamatay tungod sa pagpakasala sa usa ka tawo,

labi pang dako ang grasya ug ang gasa sa Dios nga maangkon sa daghang tawo pinaagi sa usa ka tawo nga mao si Jesu-Cristo.

—Roma 5:15

Sa ato pa, ang pagpili sa Dios wala ipasikad sa pagbuot o sa buhat sa tawo kondili sa kaluoy sa Dios.

—Roma 9:16

Uban sa dakong gahom, ang mga apostoles nagsaksi ma-hitungod sa pagkabanhaw sa Ginoong Jesus ug ang Dios nagpanalangin pag-ayo kanilang tanan. —Mga Buhat 4:33

**“Busa paghinulsol kamo ug balik sa Dios aron papason niya ang inyong mga sala. Kon himoon ninyo kini.”**

**—Mga Buhat 3:19**

**“Wala na isipa sa Dios ang panahon sa inyong pagkaignorante apan karon gisugo niya ang tanang tawo sa paghinulsol.”**

**—Mga Buhat 17:30**

**“Dili! Sultihan ko kamo nga kon dili kamo maghinulsol ug mobiya sa inyong mga sala, mangamatay usab kamong tanan sama kanila!”**

**—Lucas 13:3**

**Unya miingon si Pedro kanila, “Ang tagsatagsa kaninyo kinahanglan nga maghinulsol ug magpabunyag sa ngalan ni Jesu-Cristo aron pasayloon ang inyong mga sala ug madawat ninyo ang gasa sa Dios nga mao ang Espiritu Santo.”**

**—Mga Buhat 2:38**

**Kay ang diosnong kasubo makapahinulsol ug magtultol kaninyo ngadto sa kaluwasan ug dili kini angay basolan! Apan kamatayon ang sangpotan sa kalibotanong kasubo.**

**—2 Corinto 7:10**

“Nagtindog ako sa pultahan ug nagtuktok. Kon may makadungog sa akong tingog ug moabli sa pultahan, mosulod ako sa iyang balay ug makigsalo kaniya ug mokaon siya uban kanako.”

—Gipadayag 3:20

Nakita ni Jesus nga dako kaayo ang ilang pagtuo kaniya busa miingon siya sa paralitiko, “Anak, gipasaylo na ang imong mga sala.”

—Marcos 2:5

“Apan kon ang tawong daotan maghinulsol sa tanang sala nga iyang nahimo ug motuman sa tanan kong mga sugo ug mag-

buhat subay sa balaod ug sa katarong, mabuhi siya ug dili mamatay.”

—Ezequiel 18:21

Pabiyaa ang mga daotan sa ilang mga sala, ug ipasalikway sa mga makasasala ang ilang mga daotang hunahuna. Pabalika sila sa GINOO aron kaluy-an sila, pabalika sa atong Dios, kay andam siya sa pagpasaylo.

—Isaias 55:7

“Kay kon inyong pasayloon ang nakasala kaninyo, pasayloon usab kamo sa inyong Amahan nga atua sa langit.”

—Mateo 6:14

## **ANG PAGHIMULAG SA KAHILAYAN SA KALIBUTAN 27**

Kay gipadayag sa Dios ang iyang grasya alang sa kaluwasan sa tanang mga tawo. Ang maong grasya nagtudlo kanato sa pagbiya sa kinabuhing daotan ug sa kalibotanong kailibgon. Nagtudlo kini kanato sa pagkinabuhi nga mapinugnganon sa kaugalingon, matarong ug diosnon.

—Tito 2:11, 12

Panghugas kamo ug hinloi ninyo ang inyong kaugalingon; hunong na sa pagbuhat ug daotan sa akong atubangan.

—Isaias 1:16

Ayaw kamo pag-apil-apil sa mga daotang buhat nga iya sa

kangitngit. Hinuon ibutyag kini.

—Efeso 5:11

Ayaw ninyo higugmaa ang kalibotan o bisag unsa nga iya sa kalibotan. Kon higugmaon ninyo ang kalibotan, wala kamo mahigugma sa Amahan. Kay ang tanang butang nga iya sa kalibotan—ang unodnong kahidlaw, ang tanang gikaibgan sa mga mata ug ang tanang gipasigarbo sa tawo—dili kini iya sa Amahan kondili iya sa kalibotan.

—1 Juan 2:15, 16

Hunahunaa ang mga butang langitnon, dili ang yutan-on.

—Colosas 3:2

Kay kamo natawo pag-usab dili sa tawhanong paagi kondili pinaagi sa buhi ug walay kataposan nga pulong sa Dios.

—1 Pedro 1:23

Nasayod kamo nga si Cristo matarong busa angay ninyong hibaloan nga ang tanan nga magbuhat sa matarong anak sa Dios.

—1 Juan 2:29

Si Jesus mitubag, “Sultihan ko ikaw: walay makakita sa Gingharian sa Dios gawas kon siya matawo pag-usab.”

—Juan 3:3

Hatagan ko kamog bag-ong kasingkasing ug bag-ong espi-

ritu ug kuhaon ko ang inyong kasingkasing nga gahi sama sa bato ug ilisan ko kinig kasingkasing nga masinugtanon.

—Ezequiel 36:26

Nasayod kita nga walay anak sa Dios nga magpadayon sa pagpakasala kay manalipod man kaniya ang Anak sa Dios ug dili gayod makahimo kaniyag daotan ang Yawa.

—1 Juan 5:18

Kay bisan kinsa nga nahiusa kang Cristo, bag-o na siyang binuhat. Ang daan miagi na ug ang bag-o miabot na.

—2 Corinto 5:17

## **PATAY SA SALA—NABANHAW DIHA KANG KRISTO 29**

Sanglit gibanhaw na man kamo uban ni Cristo, tinguhaa ang mga butang nga atua sa langit diin naglingkod si Cristo sa iyang tro-  
no sa tuo sa Dios.

—Colosas 3:1

Kaniadto patay kamo tungod sa inyong pagkadaotan ug pagka-  
makasasala. Gibanhaw kita niya uban kang Cristo aron maghari uban kaniya didto sa kalangitan.

—Efeso 2:1 ug 6

Didto sa krus gidala ni Cristo diha sa iyang lawas ang tanan tang mga sala aron dili na kita magpakasala kondili magkina-

buhi na nga matarong. Pinaagi sa iyang mga samad nangaayo kamo.

—1 Pedro 2:24

Gilansang na diha sa krus sa mga tawo nga iya na ni Cristo Jesus ang mga tawhanong kai-  
libgon ug mga lawasnong pangandoy.

—Galacia 5:24

Dili gayod! Kay mahitungod sa pagpakasala patay na kita busa unsaon man nato pagpadayon pagkinabuhi diha sa sala? ...Busa isipa ang inyong kaugalingon nga patay na sa pagpakasala apan buhi alang sa Dios, hiniusa kang Cristo Jesus. —Roma 6:2 ug 11

“Ug kini mao ang kinabuhing dayon: nga ang mga tawo moila kanimo nga mao ang bugtong matuod nga Dios ug kang Jesu-Cristo nga imong gipadala.”

—Juan 17:3

Kay ang bayad sa pagpakasala mao ang kamatayon apan ang gasa sa Dios mao ang kinabuhing walay kataposan nga anaa kang Cristo Jesus nga atong Ginoo.

—Roma 6:23

“Sama nga giisa ni Moises didto sa kamingawan ang bitin nga bronsi nga gibutang ug tukon, ang Anak sa Tawo kinahanglan

nga iisa usab aron ang tanan nga motuo kaniya makabaton ug kinabuhing walay kataposan.”... Ang motuo sa Anak may kinabuhing dayon. Apan ang dili motuo sa Anak dili makabaton sa kinabuhing dayon. Magpabilin hinuon kaniya ang kapungot sa Dios hangtod sa kahangtoran.

—Juan 3:14, 15 ug 36

“Sultihan ko kamo: ang mamati sa akong gisulti ug motuo kaniya nga nagpadala kanako, may kinabuhing dayon. Siya dili silotan kay nakalatas na man siya gikan sa kamatayon ngadto sa kinabuhing hi.”

—Juan 5:24



Aron sa pagpaila nga kamo iyang mga anak, gipadala sa Dios ang Espiritu sa iyang Anak nganhi sa atong kasingkasing, ang Espiritu nga nagtuaw, “Amahan ko!” —Galatia 4:6

“Ang modawat sa akong mga sugo ug magtuman niini mao ang nahigugma kanako. Ang akong Amahan mahigugma kaniya nga nahigugma kanako ug ako usab mahigugma kaniya ug magpaila sa akong kaugalingon ngadto kaniya.” —Juan 14:21

Mga anak, ipakita ta ang matuod nga paghigugma pinaagi sa

mga maayong buhat, dili sa mga pulong lamang. Pinaagi niini maila nato nga kita iya sa kama-tuoran ug nga may pagsalig kita atubangan sa Dios.

—1 Juan 3:18, 19

Pinaagi niini, masiguro nato nga anaa kita sa Dios ug ania kanato ang Dios kay gihatag na man niya kanato ang iyang Espiritu.

—1 Juan 4:13

Makighiusa ang maong Espiritu sa atong espiritu aron pagmatuod nga kita mga anak sa Dios.

—Roma 8:16

## **32 ANG KRISTONG ANA-A SA SULOD SA ATONG KINABUHI NAKAHATAG UG KALIPAY**

**“Gisultihan ko kamo niini aron mabatonan ninyo ang akong kalipay ug mahingpit ang inyong kalipay.”**  
—Juan 15:11

**“Ug karon moanha ako kanimo. Ug gisulti ko kining mga butanga dinhi sa kalibotan aron malipay sila sa hingpit duyog kanako.”**  
—Juan 17:13

**Gilansang ako uban kang Cristo didto sa krus busa dili na ako ang nabuhi kondili si Cristo na nga ania kanako. Ug kining kinabuhi ko karon akong gikinabuhi diha sa akong pagtuo sa Anak sa Dios**

**nga nahigugma ug nagtugyan sa iyang kaugalingon alang kanako.**  
—Galatia 2:20

**Gitultolan mo ako sa dalan paingon sa kinabuhi; ang imong presensya naghatag kanakog tumang kalipay ug nagdalag katagbawan hangtod sa kahangtoran.**  
—Salmo 16:11

**Kay ang Ginghamarian sa Dios dili pagkaon ug pag-inom, kondili pagkamatarong, pakigdait ug kalipay nga gihatag sa Espiritu Santo.**  
—Roma 14:17

Kay dili pinaagi sa pagpamati sa Balaod nga ang mga tawo mahimong matarong atubangan sa Dios kondili pinaagi sa pagbuhat sa gisugo sa Balaod. —Roma 2:13

Ug papahulayon kamong nag-antos ingon man usab kami. Buhaton niya kini inigbalik sa Ginoong Jesus gikan sa langit kinuyogan sa iyang gamhanang mga anghel. Moanhi siya uban sa nagdilaab nga kalayo aron sa pagsilot niadtong wala moila sa Dios ug niadtong wala modawat sa Maayong Balita mahitungod sa atong Ginoong Jesus. Mag-antos sila sa silot nga mao ang walay

kataposang pagkalaglag ug ipahilayo sila gikan sa presensya sa Ginoo ug sa iyang mahimayaong gahom. —2 Tesalonica 1:7-9

Nasayran ninyo nga kon matinumanon kamo nga magpaulipon ni bisan kinsa, ulipon kamo niya. Kon nagpaulipon kamo sa sala, ulipon kamo sa sala ug moresulta kini sa kamatayon. Kon magmatinumanon kamo sa Dios, moresulta kini sa inyong pagkamatarong. —Roma 6:16

“Nganong nagtawag man kamo kanakog, ‘Ginoo, Ginoo,’ nga dili man kamo mobuhat sa akong gisugo kaninyo?” —Lucas 6:46

## **34 PAGESUGID KANG KRISTO GIKINAHANGLAN**

Maluwas ka kon ipahayag mo nga si Jesus mao ang Ginoo, ug sa kinasingkasing motuo ka nga gibanhaw siya sa Dios. Gihi-mo kitang matarong sa Dios kay nagtuo man kita sa kinasingka-sing gayod ug naluwas kita kay gipahayag man nato kini.

—Roma 10:9, 10

“Kon ako ug ang akong pagtu-lon-an ikaulaw sa usa ka tawo, siya usab ikaulaw unya sa Anak sa Tawo sa iyang pagbalik diha sa iyang himaya ug sa himaya sa Amahan ug sa balaang mga anghel.”

—Lucas 9:26

Ug ang tanan magsangyaw nga si Jesu-Cristo mao ang Ginoo, alang sa himaya sa Dios nga Amahan. —Filipos 2:11

“Ang moila ug moangkon ka-nako atubangan sa mga tawo, angkonon ko usab atubangan sa akong Amahan didto sa langit. Apan ang dili moangkon nga siya akoa, dili ko usab angkonon atu-bangan sa akong Amahan didto sa langit.” —Mateo 10:32, 33

Kay ang nagsalikway sa Anak nagsalikway usab sa Amahan ug ang midawat sa Anak midawat usab sa Amahan. —1 Juan 2:23

## **SI SATANAS—ANG ATONG ARKO NGA KA-AWAY 35**

Isul-ob ninyo ang tanang kahi-manan sa gubat nga gihatag sa Dios kaninyo aron makasukol kamo batok sa mga pagpanglim-bong sa Yawa. —Efeso 6:11

Unya gidala si Jesus sa Espiritu Santo ngadto sa dapit nga awaaw aron tintalon sa Yawa. Mitubag si Jesus, “Pahawa, Satanas! Ang Kasulatan nag-ingon, ‘Simbaha ang Ginoo nga imong Dios ug siya lamang ang alagari!’ ” Busa ang Yawa mibiya kaniya ug unya nangabot ang mga anghel ug miatiman kaniya.

—Mateo 4:1 ug 10, 11

Pagmaigmat ug pagmabinan-tayon kamo kay ang inyong kaa-way nga mao ang Yawa naglibot-libot kaninyo sama sa liyon nga nagngulob, nangita ug tukbo-non. Lig-ona ang inyong pagtuo ug sukli siya. —1 Pedro 5:8, 9a

“ ‘Ikaw magpabuka sa ilang mga mata ug magtultol kanila gikan sa kangitngit ngadto sa kahayag ug gikan sa gahom ni Satanas ngadto sa Dios aron pinaagi sa ilang pagtuo kanako mapasaylo ang ilang mga sala ug madawat nila ang ilang dapit uban sa ka-tawhan nga gibalaan sa Dios.’ ”

—Mga Buhat 26:18

Ang magpadayon sa pagpakasala iya sa Yawa kay ang Yawa nagpakasala man sukad pa gayod sa sinugdan. Ang hinungdan sa pag-anhi sa Anak sa Dios mao ang pagguba sa mga buhat sa Yawa.

—1 Juan 3:8

Busa, kinsay makapahimulag kanato gikan sa gugma ni Cristo? Ang kasakit ba, ang kalisdanan, ang mga paglutos, ang gutom, ang kakabos, ang katalagman, o ang kamatayon? Dili! Hinuon, taliwala niining tanan, may hingpit kitang kadaogan pinaagi kaniya nga nahigugma kanato!

—Roma 8:35 ug 37

Busa pagmasinugtanon kamo sa Dios. Sukli ninyo ang Yawa ug modagan siya. Duol kamo sa Dios ug moduol siya kaninyo.

—Santiago 4:7, 8a

Unya ang Tawong Yawan-on moanhi ug patyon siya sa Ginoong Jesus pinaagi sa huyop ug sa kasulaw sa iyang pagpadayag.

—2 Tesalonica 2:8

Karon mao ang panahon nga hukman ang kalibotan. Karon paglagputon ang nagmando niining kalibotana.

—Juan 12:31

## **GUGMA MAOY SULAY SA ATONG PAGKA-DISCIPOLO 37**

Kon may moingon, “Gihigugma ko ang Dios,” apan nagdumot diay sa iyang isigkatawo, baka-kon siya. Kay unsaon man niya paghigugma sa Dios nga wala niya makita kon wala siya maghigugma sa iyang isigkatawo nga makita niya? —1 Juan 4:20

Apan ang Espiritu naghatag sa gugma, kalipay, kalinaw, pailob, kaluoy, kaayo, pagkamaminatudon, pagkamapaubsanon ug pagkamapinugnganon sa kaugalingon. —Galatia 5:22, 23a

“Kon maghigugmaay kamo, mahibalo ang tanan nga kamo

akong mga tinun-an.”

—Juan 13:35

Unya miingon na usab si Jesus kaniya, “Simon, anak ni Juan, gihigugma mo ba ako?” Si Simon mitubag pag-usab, “Oo, Ginoo, nasayod ka nga gihigugma ko ikaw.” Si Jesus miingon kaniya, “Atimana ang akong mga karnero.” —Juan 21:16

Nasayod kita nga nakalatas na kita sa kamatayon ngadto sa kinabuhi kay gihigugma man nato ang atong isigkatawo. Apan ang wala mahigugma anaa pa sa kamatayon. —1 Juan 3:14

## **38      ANG PAGKABANHAW NI HESU-KRISTO**

**Gitugyan siya aron patyon tungod sa atong mga sala ug gibanhaw aron himoon kitang matarong. —Roma 4:25**

**Human molabay ang usa ka semana, nagtigom na usab ang mga tinun-an sulod sa lawak ug uban na kanila si Tomas. Git-rangkahan ang mga pultahan apan mitungha si Jesus ug mitin-dog sa taliwala nila ug miingon, “Mainyo ang kalinaw.” Unya mi-ingon siya kang Tomas, “Tan-awa ang akong kamot ug hikapa kini. Hikapa usab ang samad sa akong kilid. Tuo ug ayaw na pag-**

**duhaduha!” Si Tomas miingon kaniya, “Ginoo ko ug Dios ko!”  
—Juan 20:26-28**

**“Ug kami saksi sa tanan nga iyang gibuhad didto sa kayutaan sa mga Judio lakip sa Jerusalem. Gi-patay siya nila pinaagi sa paglan-sang kaniya didto sa krus. Apan gibanhaw siya sa Dios sa ikatulo ka adlaw ug gipadayag siya. Wala makakita kaniya ang tanang mga tawo kondili kami lamang nga gi-pili sa Dios ingon nga mga saksi, kami nga nangaon ug nanginom uban kaniya human siya maban-haw.” —Mga Buhat 10:39-41**



# ANG PAGKABANHAW MAOY ATONG MAHIMAYAONG PAGLAUM

39

Kay nasayod kami nga ang Dios nga nagbanhaw sa Ginoong Jesus magbanhaw usab kanamo uban kang Jesus, ug iya kaming dad-on uban kaninyo ngadto sa iyang atubangan.

—2 Corinto 4:14

“Hapit na moabot ang panahon ug gani miabot na nga ang mga patay makabati sa tingog sa Anak sa Dios ug mabuhi ang mamati niini. Ayaw kamo kahibulong kay moabot ang panahon nga ang tanang mga patay makadungog sa iyang tingog ug manggula sila sa ilang lubong: kadtong

maayog binuhatan mabanhaw ug mabuhi sa dayon ug kadtong daotag binuhatan mabanhaw apan silotan.” —Juan 5:25b ug 28, 29

Sukad niadtong higayona, giklaro na gyod ni Jesus pagsulti ngadto sa iyang mga tinun-an: “Kinahanglang moadto ako sa Jerusalem aron paantuson pagayo sa mga namunoan sa mga Judio ug sa mga pangulong pari ingon man sa mga magtutudlo sa Balaod. Patyon ako nila apan sa ikatulo ka adlaw mabanhaw ako.” —Mateo 16:21

## **40 PAGKABALAANON NGADTO SA GINOO**

Paninkamoti ninyo ang pagpakigdait sa tanang tawo ug sa pagkinabuhi nga balaan kay gawas niini walay makakita sa Ginoo.  
—Hebreo 12:14

Gipili kamo sumala sa tuyo sa Dios nga Amahan ug gihimong balaang katawhan pinaagi sa iyang Espiritu aron magmasinugtanon kamo kang Jesu-Cristo ug mahinloan sa iyang dugo. Mainyo unta ang grasya ug pakigdait sa Dios. Pagkinabuhi hinuon kamo nga balaan kay balaan man ang Dios nga nagtawag kaninyo.  
—1 Pedro 1:2 ug 15

Ug nanumpa nga iya kitang luwason gikan sa atong mga kaaway. Mitugot siya kanato nga mag-alagad kaniya sa walay kahadlok, pinaagi sa pagkinabuhi nga balaan ug matarong sa atubangan niya sa tanang panahon.  
—Lucas 1:74, 75

Kon hinloan sa tawo ang iyang kaugalingon gikan niining daotang mga buhat, gamiton siya alang sa espesyal nga mga katuyoan kay gihalad man siya aron kapuslan sa iyang Agalon ug siya andam sa tanang buhat nga maayo.  
—2 Timoteo 2:21

Ako nagbunyag kaninyo pinaagi sa tubig aron pagpakita nga naghinulsol ug mibiya kamo sa inyong mga sala. Apan ang moanhi sunod kanako magbunyag kaninyo pinaagi sa Espiritu Santo ug sa kalayo. Siya mas gamhanan kay kanako ug dili ako angay bisan gani sa pagbitbit sa iyang sandalyas. —Mateo 3:11

Didto may usa na ka dakong dalan ug nganlan kinig “Dalan nga Balaan.” Dili makahimo pagagi niini ang mga makasasala o mahisalaag didto ang mga buangbuang. —Isaias 35:8

Sa wala pa buhata ang kalibotan gipili na kita sa Dios diha

kang Cristo aron mahimo kitang balaan ug walay sala sa iyang atubangan. Tungod sa gugma.

—Efeso 1:4

Tungod niana namatay usab si Jesus sa gawas sa ganghaan sa siyudad aron sa paghinlo sa mga sala sa katawhan pinaagi sa iyang kaugalingong dugo.

—Hebreo 13:12

Apan kon isugid nato sa Dios ang atong mga sala, siya nga matarong ug matinumanon sa iyang saad mopasaylo gayod sa tanan natong mga sala ug maghinlo sa tanan natong mga kalapasan. —1 Juan 1:9

“Apan kon mokunsad na kaninyo ang Espiritu Santo, maka-dawat kamog gahom ug mahimo kamong akong mga saksi....”

—Mga Buhat 1:8a

Apan wala na kamo magkinabuhi nga minandoan sa tawhamong kinaiya kondili sa Espiritu kon tinuod man ugaling nga ang Espiritu sa Dios anaa na sa inyong kasingkasing. Kadtong walay Espiritu ni Cristo, dili iya ni Cristo.

—Roma 8:9

Si Bernabe usa ka maayong tawo, puno sa Espiritu Santo ug sa pagtuo. —Mga Buhat 11:24a

Human sila mag-ampo, nauyog ang dapit nga ilang gitigoman. Ug silang tanan napuno sa Espiritu Santo ug sa walay kahadlok nagwali sa mensahe sa Dios.

—Mga Buhat 4:31

Ug nalipay pag-ayo ang mga tinun-an ug napuno sa Espiritu Santo.

—Mga Buhat 13:52

Ihatag ko kaninyo ang akong espiritu ug himoon ko kamong masinugtanon sa akong mga gimbut-an ug mga lagda.

—Ezequiel 36:27

# MGA KAHIBULONGANG SAAD NGADTO SA MGA KRISTIANO

43

“Pahiran niya ang ilang luha ug wala nay kamatayon o kasubo, paghilak o kasakit kay nahanaw na man ang daang mga butang.”  
—Gipadayag 21:4

Mga minahal kong igsoon, ayaw kamo kahibulong sa mga mapait nga pagsulay nga inyong giantos. Ayaw kini isipa nga talagsaong butang nga nahitabo kaninyo. Paglipay hinuon nga nakaambit kamo sa mga pagantos ni Cristo aron magmalipayon kamo inigpadayag na sa iyang himaya. —1 Pedro 4:12, 13

“Akoy nagbuhat sa tanang butang busa akoa kining tanan, nag-ingon ang GINOO. Apan ang akong kahimut-an mao ang tawong mapaubsanon, mahinulsolon ug mahadlokon kanako.” —Isaias 66:2

Apan labaw sa tanan, paharia ninyo ang Dios ug pagkinabuhi kamo uyon sa iyang kabubut-on ug ang ubang mga butang ihatag ra niya kaninyo. —Mateo 6:33

Salig sa GINOO ug buhata ang maayo, ug magpuyo ka diha sa yuta nga layo sa kadaotan.  
—Salmo 37:3

## 44 MGA SAAD NGADTO SA MGA GITINTAL

Ug tungod kay nag-antos man siya ug gitintal, makatabang usab siya kanila nga gitintal.

—Hebreo 2:18

Daghang kalisdanan ang antuson sa matarong, apan luwason siya sa GINOO gikan niining tanan.

—Salmo 34:19

Nasayod kita nga diha sa tanang butang nagbuhat ang Dios alang sa kaayohan niadtong nahigugma kaniya, kadtong iyang mga tinawag sumala sa iyang katuyoan.

—Roma 8:28

“Mag-uban ako kanimo iniglatas

mo sa katubigan, ug dili ka malumos inigtabok mo sa mga suba; inig-agi mo sa kalayo dili ka mapaso o lamyon sa siga niini.”

—Isaias 43:2

Ang tanang tintasyon nga naagian ninyo naagian usab sa kadaghanan. Kay ang Dios motuman gayod sa iyang saad ug dili siya motugot nga tintalon kamo labaw sa inyong madaog. Sa panahon nga tintalon kamo, maghatag siya kaninyo ug kusog aron kamo makalahutay ug unya makalingkawas gikan niini.

—1 Corinto 10:13

“Ang modaog bistihag puti ug dili ko papason ang ilang ngalan sa libro sa kinabuhi. Sa atubangan sa akong Amahan ug sa iyang mga anghel ipahayag ko nga sila akong mga sakop.”

—Gipadayag 3:5

“Ang modaog patuparon ko paglingkod sa akong trono ingon nga gipalingkod ako tupad sa akong Amahan diha sa iyang trono tungod kay midaog man ako.”

—Gipadayag 3:21

“Ang makadaog himoon kong haligi sa templo sa akong Dios ug magpabilin gayod siya niini.

Isulat ko diha kaniya ang ngalan sa akong Dios ug ang ngalan sa siyudad sa akong Dios nga mao ang bag-ong Jerusalem nga manaog sa langit gikan sa akong Dios. Isulat ko usab kaniya ang bag-o kong ngalan.”

—Gipadayag 3:12

“Busa kon may dalunggan ka, pamatia ang giingon sa Espiritu ngadto sa mga simbahan! Kad-tong modaog hatagan ko sa katungod sa pagkaon sa bunga sa kahoy nga naghatag ug kinabuhi nga anaa sa Tanaman sa Dios.”

—Gipadayag 2:7

## ANG DIOS NAGSULTI KANATO MAHITUNGOD SA DIBURSYO

“Apan karon sultihan ko kamo nga kinsa kadtong mobulag sa iyang asawa bisan wala magluib kaniya makasala kay siya man ang hinungdan sa pagpanapaw unya sa iyang asawa kon magminyo kini pag-usab. Bisin ang mangasawa kaniya makapanapaw usab.” —Mateo 5:32

Pananglitan, ang babayeng minyo ubos sa gahom sa iyang bana sumala sa balaod samtang buhi pa ang iyang bana. Apan inigkamatay sa iyang bana, nahilingkawas na siya gikan sa

maong balaod. Busa kon makigpuyo siyag laing lalaki samtang buhi pa ang iyang bana, tawgon siyag mananapaw. Apan inigkamatay sa iyang bana, gawasnon na siya ug dili tawgon nga mananapaw kon magminyo siyag laing lalaki. —Roma 7:2, 3

Kon mobulag siya, kinahanglan nga dili siya magminyo pag-usab o kaha makig-uli siya sa iyang bana ug ang bana kinahanglan nga dili makigbulag sa iyang asawa. —1 Corinto 7:11



“Kay ang Anak sa Tawo moabot sama sa kilat nga mokilab tadlas sa tibuok langit gikan sa sidlakan ngadto sa kasadpan.”

—Mateo 24:27

“Moanha ako dayon. Bantayi nga dili maunsa kanang imong gihuptan aron walay makailog sa imong korona sa kadaogan.”

—Gipadayag 3:11

“Busa kon ako ug ang akong pagtulon-an ikaulaw sa usa ka tawo niining daotan ug makasasala nga kaliwatan, ikaulaw usab siya sa Anak sa Tawo inig-abot niya inubanan sa hima-

ya sa iyang Amahan kuyog sa mga anghel nga balaan.”

—Marcos 8:38

Busa kinahanglan nga magpai-lob usab kamo. Lig-ona ang inyong paglaom kay duol na ang pagbalik sa Ginoo. —Santiago 5:8

Ug kon atua na ako didto ug makaandam nag dapit alang kaninyo, mobalik ako ug kuhaon ko kamo aron bisag asa ako, atua usab kamo. —Juan 14:3

“Busa kamo usab kinahanglan mangandam kay ang Anak sa Tawo moabot sa oras nga wala ninyo paabota.” —Lucas 12:40

## 48      **ANG IKADUHANG PAGBALIK NI KRISTO**

“Busa kamo usab kinahanglan mangandam kay ang Anak sa Tawo moabot sa oras nga wala ninyo paabota.” —Lucas 12:40

Minahal kong mga igsoon, kita karon mga anak na sa Dios. Wala pa nato matino kon maunsa gayod unya kita apan ang nasayran nato mao nga inig-abot na ni Cristo mahisama kita kaniya kay makita man nato siya sa iya gayong pagkasiya. —1 Juan 3:2

Miingon sila, “Mga taga-Galilea, nganong nagbarog man kamo dinhi ug nagsigig hangad sa langit? Si Jesus nga gibayaw

ngadto sa langit mobalik sa samang paagi sa iyang pagkayab ngadto sa langit.”

—Mga Buhat 1:11

“Pamati! Moanhi ako sama sa kawatan. Bulahan ang nagtukaw ug nag-amping sa iyang bisti aron dili siya maglakawlakaw nga hubo ug maulawan atubangan sa katawhan!”

—Gipadayag 16:15

“Unya motungha ang Anak sa Tawo—moabot siya nga gamhanan ug mahimayaon diha sa panganod.” —Lucas 21:27

## **ANG PULONG SA DIOS**

**Salmo 119:105**

**Ang imong pulong maoy suga nga magtultol kanako ug maoy kahayag sa akong agianan.**

**Mateo 22:29**

**Si Jesus mitubag kanila, “Pagkasayop ninyo! Ug kini nahitabo kay wala man kamo masayod sa Kasulatan ug sa gahom sa Dios.”**

**Lucas 21:33**

**“Ang langit ug ang yuta mangahanaw apan dili gayod mapakyas ang akong gisulti.”**

**2 Timoteo 3:16**

**Ang tibuok Kasulatan gisulat uban sa lamdag gikan sa Dios ug mapuslanon alang sa pagtudlo**

**sa kamatuoran, sa pagbadlong, sa pagsaway ug sa pagtudlo unsaon pagkinabuhi nga matarong.**

**2 Pedro 1:21**

**Kay walay propesiya nga nahimo gumikan sa pagbuot sa tawo. Ang Espiritu Santo maoy nagmando sa ilang pagsulti sa mensahe nga gikan sa Dios.**

**Salmo 119:89**

**Molungtad hangtod sa kahangtoran ang imong pulong, O GINOO; dili kini mausab diha sa kalangitan.**

**Salmo 119:11**

**Giampingan ko ang imong balaod sulod sa akong kasingkasing aron dili ako makasala kanimo.**

Scripture texts are taken from the *Ang Bag-ong Maayong Balita*, © 1999 Philippine Bible Society. Used with permission. All rights reserved.

Ang mga Basahon gikutlo gikan sa *Ang Bag-ong Maayong Balita Biblia* © 1999 sa Philippine Bible Society. Gigamit nga may pagtugot. *All rights reserved.*

---

Published in numerous languages by World Missionary Press, Inc., as God supplies funds in answer to prayer. **For questions or more information by country, visit: [www.wmp-contacts.org](http://www.wmp-contacts.org)**

World Missionary Press  
PO Box 120  
New Paris, IN 46553-0120 USA  
[www.wmpress.org](http://www.wmpress.org)

1-25



Read booklets online or by App  
[www.wmp-readonline.org](http://www.wmp-readonline.org)

8 Cebuano HFA